

*Competencia di CARIFTA a termina cu un broche di oro*

## Seleccion di landamento di Aruba ta logra mas medaya na Jamaica

**ORANJESTAD** - Despues di un exitoso prestacion durante e competencia Sur Americano, Aruba a participa na CARIFTA, cu tambe ta un campeonato di landamento internacional, cu ya ta tumando luga pa 21 aña consecutivo, unda cu 22 isla den region ta haya invitacion pa participa y Aruba sigur tin

mas di 10 aña ta bayendo cu su atletanan.

Den transcurso di aña, Aruba a desaroya y crece substancialmente den cantidad pero tambe calidad di atleta y loke e 25 atletanan a logra na e di 21 CARIFTA na Kingston-Jamaica, competiendo entre 17 isla y 345 landado, bou guia di headcoach Ismael Santiesteban Espinosa y coach Ynocente Chacon, ta djis un muestra hopi cla di dedicacion, disciplina y amor pa deporte y nan pais.

“Nos a haya compliment, no solamente di e tremendo prestacion deportivo di nos atletanan, pero tambe di e comportacion asina ehemplar y disciplina cu nan a demostra tanto na piscina como na hotel. Nos atletanan a destaca den region Caribe y awor nos siguiente enfoke ta CCCAN, cu ta tuma luga na Costa Rica, cu tambe ta un competencia di nivel Centro Ameri-



Yegada di seleccion di landamento di Aruba.

cano y Caribe y esey ta fin di juni. Nos ta konkistando poco poco, varios pais grandi den e mundo di landamento, como un pais super chikito pero cu gran potencial y talento,” segun Annelies Ponson, vice presidente Arubaanse Zwembond (AZB).



Despues di 4 dia di competencia duro, unda cu mainta e atletanan tin cu landa un eliminatorio, ya cu anochi ta solamente 8 atleta ta pasa pa final, Aruba ta logra keda pa prome biaha den historia di landamento internacional, na di 3 luga, cu un total di 48 medaya; 21 di oro, 15 di plata y 12 di brons, haciendo Aruba e isla cu a logra mas medaya tambe na e competencia. Un exito total, mirando cu Aruba no tabatin un ekipo asina grandi compara cu Guadalupe, Trinidad y Tobago, Jamaica, Bahamas, cu ta biaha cu un seleccion di no menos di 34 atleta.

Banda di gana di 3 luga y e isla cu mas medaya, Aruba ta logra 2 High Point Trophy individual, cu e atletanan;

Mikel Schreuders den categoria 13-14 masculino y Jordy Groters categoria 15-17 masculino. Dos atleta cu sigur tin tur potencial y talento pa yega hopi leu den landamento internacional.

“Nos atletanan a logra kibra record di CARIFTA, cu tabata existi pa hopi aña e esey ta un logro grandi como pais,” Annelies a indica. Den un relato mas amplio, lo elabora riba prestacion di cada categoria. AZB kier gradici Minister Enseñansa y Husticia, drs. Artur Dowers, como tambe tur medio di prensa cu tabata presente durante e yegada di nos atletanan. Boso contribucion y atencion ta loke ta haci nos atletanan ta mas comprometi cu nan deporte y pais Aruba. □